

# Mokgekolo le kolobe ya gagwe

Kanegoleswa ka Wendy Hartmann  
Diswantšho ka Jiggs Snaddon-Wood



Letšatši le lengwe mokgekolo o be a swiela ka gae ge a tla hwetša tšhelete yeo a lebetšego ka yona. O be a thabile a bile a bina a opela.

“Lebelela,” a realo a swaretše tšhelete godimo moyeng. “Bjale ke tla dira eng ka yona? Ke a tseba! Ke tla ya mmarakeng ka ya go reka kolobe.”

Letšatši la go latela, o ile mmarakeng a reka kolobe ye nnyane ya botse. O ile a bea kholoro kolobeng, a kgokelela lenti kholorong gomme a sepela a ya gae le yona. Mo tseleng, ba ile ba bona legora la kota la tlase.

Mokgekolo o ile a re, “Hle, Kolobe, tshela legora.” Efela kolobe ga se ya tshela legora. O e kgopetše gantši efela kolobe ya se šuthe.

Go se go ye kae gwa tšwelela mpša e sepediša gomme mokgekolo a re go yona, “Mpša, Mpša! Etlā mo. Rakediša kolobe hle. Ga e tshela legora gomme nka se ye gae bošego bja lehono.”

Efela mpša ga e rakediše kolobe.



Ka fao mokgekolo o ile a tšea pakete ya meetse yeo e bego e le kgauswi le legora. “Meetse, tšhela mpša ye hle. Mpša ga e rakediše kolobe. Kolobe ga e tshele legora gomme nka se ye gae bošego bja lehono.”

Efela meetse a se tšhele mpša.

Mokgekolo o ile a bona kgomo kua pejana. E rile ge e batamela, a goeletša, “Kgomo, Kgomo, enwa meetse hle. Meetse ga a tšhele mpša. Mpša ga e rakediše kolobe. Kolobe ga e tshele legora ka mo go a fifala. Nna le kolobe re be re swanetše go ba re le gae ka nako ye.”

Kgomo ya se nwe meetse.

Go se go ye kae gwa feta raleselaga.

O ile a mo emiša a mo kgopela, “Raleselaga, raleselaga, sepela le kgomo ye hle. Kgomo ga e nwe meetse. Meetse ga a tšhele mpša. Mpša ga e rakediše kolobe. Kolobe ga e tshele legora. Ke bona ngwedi o a tšwa. Nna le kolobe re be re swanetše go ba re na le iri le seripa re le gae.”

Efela raleselaga ga se a tšea kgomo ...

Bjale mokgekolo o be a thomile go befelwa – ga go yo a tla mo thušago! Ka fao, o ntšhitše thapo morabeng wa gagwe a re, “Thapo, Thapo, hle bofa raleselaga. Raleselaga ga a tšeye kgomo. Kgomo ga a nwe meetse. Meetse ga a tšhele mpša. Mpša ga e rakediše kolobe. Kolobe ga e tshele legora, gomme ke bona seetša sa ngwedi. Nna le kolobe re be re swanetše go ba bjale re na le diiri re le gae!”

Efela thapo ya se bofe raleselaga.

Ka nakwana, legotlo la putla tšhemo, gomme mokgekolo a le bitša, “Legotlo, Legotlo, eja thapo hle. Thapo ga e bofe raleselaga. Raleselaga ga a tšeye kgomo. Kgomo ga a nwe meetse. Meetse ga a tšhele mpša. Mpša ga e rakediše kolobe. Kolobe ga e tshele legora gomme ngwedi o šetše o le godimo lefaufaung. Ka nako ye nna le kolobe re be re swanetše go ba re itokišetša go ya malaong.”

Legotlo le ile la ema. Le ile la lebelela mokgekolo. “Ee,” la realo legotlo. “Ge o ka mpha tšhesenyana ke tla sohla thapo.”

Mokgekolo a sobeletša seatla ka morabeng wa gagwe, a phophola gannyane gomme a ntšha seripa se sennyane sa tšhese a se fa legotlo. Legotlo le rile goja tšhese, la thoma go kokona thapo;

thapo ya thoma go bofa raleselaga; raleselaga a thoma go soka kgomo; kgomo ya thoma go nwa meetse; meetse a thoma go tshela mpša; mpša ya thoma go kitimiša kolobe gomme ... kolobe ya tshela legora.



Mokgekolo o ile a hemela godimo kudu gomme a sepela a ya gae. “Mafelelong,” a realo.

Naa yena le kolobe ba fihlile gae nako mang? Ga go yo a tsebago. Efela ge eba mokgekolo yo o dula kgauswi le wena ebile o a mo tseba, o re botše.

### E BA LE BOITLHAMELO!

- Kgetha tiragatšo go tšwa kanegelong mo mokgekolo a boletago.
- Thala seswantšho sa tiragatšo ye gomme ka moragonyana o thale pudula ya polelo ya mokgekolo. Ngwalollela mantšu a go tšwa kanegelong ka gare ga pudula ya polelo. Gabjale thala dipudula tša polelo tša diphoofole le/goba dilo tša ka tiragatšong gomme o di tlatše ka mantšu ao o naganago gore a kabe a boletšwe!



# Mokgekolo le kolobe ya gagwe

Kanegoleswa ka Wendy Hartmann • Diswantšho ka Jiggs Snaddon-Wood

## Go bona

Naa o nagana gore mokgekolo o be a lapile kudu ge a fihla gae? Kolobe yona? Thala seswantšho sa bona ka morago ga ge ba fihla gae.



## Go bala

Naa o sa gopola gore mokgekolo o be a nyaka gore e nngwe le e nngwe ya tše e dire eng: kolobe, mpša, meetse, kgomo, thapo, raleselaga, legotlo? Ge nkabe o bile mokgekolo yo nkabe o dirile eng gore kolobe e tshele legora (ntle le go e gobatša)?



## Go ngwala

Kgetha karolwana go tšwa kanegelong moo mokgekolo a bolelago. Thala seswantšho sa karolwana yeo gomme o terowe nkgokolo kgauswi le molomo wa mokgekolo. Kopiša mantšu a gagwe go tšwa kanegelong gomme o a ngwale ka gare ga nkgokolo yeo. Bjale thala dinkgokolo kgauswi le melomo ya diphoofolo le/goba didirišwa ka gare ga karolwana gomme o di tlatše ka mantšu ao o nagana gore di ka ba di a boletše!



## Go dira dilo

Šomiša dipoleite tša pampiri goba khatepoto, penta gomme o tleme thapo go dira dithibasefahlego bakeng sa babapadi ka gare ga kanegelo.



## Go bapala terama

Raloka kanegelo ka go šomiša dithibasefahlego tšeo o di dirilego.

